

Usul MIC puji kepemimpinan PM

Oleh G. MANIMARAN dan P. BALAKUMAR

SEREMBAN 11 Dis. — Perwakilan-perwakilan MIC yang membahaskan usul mengenai kepemimpinan Datuk Seri Dr. Mahathir Mohamad memuji pendirian beliau berhubung isu-isu antarabangsa khususnya yang membabitkan kepentingan negara-negara dunia ketiga.

Selain daripada itu, perwakilan-perwakilan juga menyifatkan kelantangan Perdana Menteri menyuarakan pendapat negara menyebabkan Malaysia yang satu ketika tidak dikenali negara asing mula mendapat perhatian.

Perwakilan wanita tunggal, Kamala Ganapathy ketika membahaskan usul tersebut berkata, sikap Dr. Mahathir tidak bertolak ansur apabila mengemukakan pandangan berhubung isu-isu antarabangsa adalah satu perkembangan positif dalam menaikkan imej negara.

“Dr. Mahathir adalah jaguh negara-negara dunia ketiga. Ketegasan dan keberanian beliau telah membolehkan Malaysia disegani oleh rakyat asing.

“Selain daripada itu, pendirian Malaysia yang kini mula diterima oleh arena antarabangsa juga menandakan Dr. Mahathir sebagai pemimpin yang bersifat intelektual,” katanya.

Kata perwakilan itu, usaha-usaha beliau membela nasib rakyat Bosnia dan hak asasi manusia adalah tindakan yang perlu dihargai oleh setiap rakyat.

Usul tersebut yang merupakan salah satu daripada enam usul yang dibahaskan pada Perhimpunan Agung MIC Ke-41 hari ini, antara

lain melahirkan sokongan ke atas usaha Dr. Mahathir meninggikan tahap sosio ekonomi negara dan inisiatif politik dan diplomatik dalam menyelesaikan isu Bosnia.

Dalam pada itu, S. Subramaniam dari Bahagian Pagoh, Johor pula berkata, pandangan luas dan sikap tegas yang diperlihatkan oleh Dr. Mahathir secara tidak langsung menaikkan martabat Malaysia di peringkat tempatan dan antarabangsa.

Kata beliau, sebagai contoh pandangan Perdana Menteri di persidangan Forum Ekonomi Asia Pasifik (APEC) di Bogor, Indonesia jelas menunjukkan Malaysia kini dihormati sebagai salah sebuah negara tegas.

“Selain itu, kesediaan Presiden Amerika Syarikat untuk mendapatkan pandangan Perdana Menteri juga menunjukkan segala pendapat yang dikemukakan oleh Malaysia mula mendapat perhatian antarabangsa,” katanya.

K. Balasundram dari Bahagian Ipoh pula memberitahu, masyarakat India seharusnya bersedia untuk menghayati matlamat-matlamat Wawasan 2020 sebagai tanda menghargai kepemimpinan Dr. Mahathir.

Sebaliknya kata beliau, kepimpinan dinamik Perdana Menteri hanya akan bererti sekiranya segala amanat yang beliau utarakan diberi tumpuan oleh setiap masyarakat India.

“Daripada kita yang hadir ini, berapa orang yang telah memahami dan menghayati Wawasan 2020. Kita seharusnya sedia untuk menghadapi cabaran-cabaran tersebut,” katanya.